

Vásihit kreatiiva dollagárgasa



Kind Of Like This- KOLT. Dat lea deaivvadeapmi kreatiiva olbmuide geat háliidit eará dáiddáriiguin oahpásmuvvat ja ovttasbargat. Dál lea KOLT johtán lulli- Ruotas gitta Guovdageidnui.

1 BRITA ÅSE NORLEMANN
brita.ase.norlemann@nrk.no

Publisert 28.04.2011 15:16.

– Dáidda lea hui guovddažis sámi kultuvrras, ja danin dákkár deaivvadeapmi heive bures Sápmái, lohká Elle Sofe Henriksen gii lei mielde lágideame KOLT-deaivvadeami Guovdageainnus.

"Sullii ná"

KOLT mearkkaša Kind Of Like This, "Sullii ná". KOLT galgá leat deaivvadanbáiki dáiddáriidda ja eará kreatiiva olbmuide, ja dás besset sii cađahit kreatiiva proseassaid ovttas eará dáiddáriiguin. Ja dat proseassa lea deháleabbo go ieš dat loahppačájáhus dahje -čájálmas.

– Dávjá dáiddarat barget okto hui ollu. De lea dehálaš sidjiide beassat earáiguin deaivvadit, ovttasbargat ja obalahkái oahpásmuvvat, lohká son.



Akrobahtta Ejnar Askberger maid oasálastii Guovdageainnu KOLT-deaivvadeamis.

Foto: Elle Sofe Henriksen/Privat

Vásihit kreatiiva dollagárgasa

Koreográfá Alexandra Wingate álggahii KOLTa jagis 2007 go váillahii deaivvadanvejolašvuoda kreatiiva oahppásiiguin miehtá Eurohpá. Son háliidii ahte son gii ii oro stuora gávppogis, maddái galgá beassat vásihit kreatiiva dollagárgasa ovttas earáiguin,



Alexandra Wingate álggahii KOLT jagis 2007.

Foto: Elle Sofe Henriksen/Privat

Álgu rájes leat lágiduvvon čieža KOLT-deaivvadeami, eanas dain Ruotas. Diibmá lágiduvvui KOLT maddái Riddu Riđđu-festiválas.

– Dat lea šaddan mihá stuorábun go ledjen jáhkkán álggos, ja lea erenoamáš miellagiddevaš go davvi-guovllus ja sámis lea oasálastigoahtán, lohka Wingate.

Eará dáiddasurggiin rávvagat

Guovdageainnu deaivvadeapmái serve sihke dánsejeaddjit, koreográfá, govvadáiddárat, čállit ja maddái duojár. Elle Sofe Henriksen lea ieš dánsejeaddji, ja oasálastii Riddu Riđđu-KOLTas.

– Go okto bargá, de dávjá olmmoš vállje daid seammahat čovdosiid. De lea buorre oaidnit maid earát dahkat, fuomášit ođđa vejolašvuodaid. Mu mielas lea hui

soma go áibbas eará dáiddasurggiin bohtet oaivilat, go dávjá leat dušše dánsejeaddjit ja koreográfát mat dadjet juoidá. Olmmoš oahppá go earáid guldala.

KOLT maiddái boahhteáiggis

Son gal áinnas lágdivččii dákkár deaivvademiid Guovdageainnus maiddái boahhteáiggis. Son háliidii ahte olbmot galge boahtit Sápmái oaidnit guovllu čábbodaga.

– Mángasat dain háliidit boahhteáiggis boahtit ruovttoluotta bargat prošavttuiguin dáppe, ja jurdda livččii ge lágídit KOLT dáppe maiddái boahhte jagi.

http://nrk.no/kanal/nrk_sapmi/ardna/1.7610776